

Por a drecha e edificio pa acomoda Censo y Parlamento

EDIFICIO TABATA PARTI DI PLAN PA GOBIERNO HAYA OFICINA NA BEACH?

ORANJESTAD (AAN): For di cuanto tempo Gobierno Oduber tin den su mente pa bay cambia un hotel den oficina pa Gobierno?? E proyecto Eagle Beach a keda paraliza pa un dia e bira oficina di Gobierno?? E hecho cu a nenga di drecha e edificio den Wilhelminastraat tabata pa habri caminda pa Gobierno Oduber bay traha den un hotel na beach?? "Di e hendenan aki bo por spera cualquier locura. Un tempo nan tabata kier a core den limousine y awor ta den hotel nan kier goberna. Pesey mi ta puntra si ta pa malo a laga e edificio den Wilhelminastraat bay perdi".

Uno di e comentarionan di ciudadanonan indigna pa loke a pasa cu e edificio den Wilhelminastraat. Ciudadanonan, cu ta conciente di e necesidad pa mas espacio pa departamentonan di Gobierno den centro di ciudad y ta saca nan conclusion for di loke a socede cu e edificio den Wilhelminastraat.

Segun e ciudadanonan por a drecha e edificio den

Wilhelminastraat di tal forma cu e por a acomoda Censo y Parlamento. Pa Parlamento e oficina aki lo tabata uno sumamente bunita mientras cu otro parti por a acomoda Censo. Cu un suma aceptable Gobierno por a logra di drecha e edificio y soluciona e problema di espacio pa oficianan di Gobierno.

Si Censo y Parlamento a muda pa e edificio den Wilhelminastraat, Gobierno lo a haya hopi espacio liber pa expande e oficianan di Gobierno. Pero, manera a worde muestra, esey no a socede.

Gobierno a opta pa laga e edificio den Wilhelminastraat bay perdi y awor Promer Ministro Nel Oduber ta anuncia cu Gobierno ta bay usa un hotel, cu Gobierno a laga fracasa, como oficina di Go-

bierno. "Nunca hende a tende na mundo cu un hotel ta worde cambia den oficina di Gobierno? Gobierno mester ta completamente loco. Nan mester a soña cu un bida dushi na beach y pesey a trahanan plan pa bay goberna for di un hotel ariba beach," un ciudadano a trece dilanti.

El a muestra cu si Gobierno Oduber tabata un Gobierno serio, awe e edificio den Wilhelminastraat lo no a worde kima pa drogadictonan, pero lo tabata den uso pa departamentonan importante y Eagle Beach lo tabata un proyecto termina, mientras Gobierno lo a amplia su actual oficianan. "Placa di Pueblo ta dushi. Pesey Gobierno Oduber no kier laga e caha bay, aunke el a perde eleccion," a worde observa.